

M140D: Mariensequenz aus Muri (D)

0,1 Ave uil liehttiu maris stella
0,2 ein lieht der christenhait MARIA
0,3 aller magde lucerna .
0,4 Frou dich gottes cella
0,5 beslozzeniu porta
0,6 wand du den gebare
0,7 der dich vnde alle die werlt geschvof
0,8 nu sihe wie rein ein vaz du maget dvo ware .
0,9 Sende minen sinnen
0,10 des himiles chvniginne
0,11 ware rede svoze
0,12 daz ich den uater vnde den svn
0,13 vnde den uil heren geist loben mvoze .
0,14 Immer maget an ende
0,15 mvoter ane missewende
0,16 frovve du hast uersvonet daz eua zerstorte
0,17 diu got vberhorte .
0,18 Hilfe mir frowe here
0,19 trost uns arme durh di ere
0,20 daz din got vor allen wiben ze mvter gedahte .
0,21 als dir gabriel brahte .
0,22 Do du in uername
0,23 wie du uon erste erchome
0,24 din uil rainiu schame
0,25 erschrach von dem mare
0,26 wie maget ane man
0,27 immer chint gebare .
0,28 Frou an dir ist wnder
0,29 muter vnd maget dar vnder
0,30 der die helle brach .
0,31 der lag in dinem libe
0,32 unde wrde iedohc
0,33 dar under niet ce wibe .
0,34 Dv bist aleine der salden borte
0,35 ia wrde du swanger von Worten
0,36 tir chom ein chint
0,37 frowe durh tin or
0,38 des iuden xp-isten vnde heiden sint

0,39 vnde des genade hie was endelos
0,40 aller maide ein gimme
0,41 daz chint dich im ce muter erchos .
0,42 Din werdicheit diu n ist nichit chleine
0,43 ia trvoge du maget raine
0,44 daz lebende brot
0,45 daz was got selbe
0,46 der sinen munt zvo dinen brusten bot
0,47 vnd dine brust in sine hende vie .
0,48 owi chvnigin
0,49 was genadin got an dir begie .
0,50 La mich genizen swenne ich dich nenne
0,51 daz ich MARIA frowe daz geloube vnd daz an dir erchenne
0,52 daz niemen gvoter
0,53 mach des verlovgen du ne sist der barmvge mvoter .
0,54 La mich geniezen des du ie begienge
0,55 in dirre werlt mit dinem svn so du n mit hande zvo dir vinge
0,56 so wol dir des chindes
0,57 hilf mir vmb in ich waiz frowe wol daz tu n senften vindest .
0,58 Diner bet mach dir din lieber svn niemer verzihen .
0,59 Bit in des daz er mir ware ruwe muoze verlihen .
0,60 Vnd daz er durch den grimmen tot
0,61 den er leit durh die mennischeit
0,62 sehe an mennisliche not .
0,63 Vnd daz er durh die namen drie
0,64 siner christenlicher hantgetat
0,65 genadich in den svnden si .
0,66 Hilfe mir frowe da diu sele von mir scheide
0,67 da chvm uns ce troste
0,68 wand ich gelovbe daz du bist
0,69 mvoter vnde maget beidiu .